

# INUIT ATAQATIGIIT

## Inatsisartuni



UKA 2018/137  
24.10.18  
Múte Bourup Egede

**Kingusinnerpaamik UKA 2019-mi Majoriaq pillugu naliliinermik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Naliliinermi nassuiarneqassaaq innuttaasut ilinniniarnissaannut sulilernissaannullu piareersaasarnissaminut Majoriap siunertani qanoq naammassitigisimaneraa. Naliliinermut ilanngullugu aamma maannamut misilittakkat tunngavigalugit pitsanngorsaannissanut sipaarutissanullu siunnersuutit ilannguteqquneqarput.**

### **(Inatsisartunut ilaasortaq Nivi Olsen, Demokraatit)**

Inuit Ataqatigiit pilersinneqarnerminniilli inuiaat imminut napatittut anguniarlugillu kivitseqatigiinnikkut isumassortariaqartut isumassorneqarnissaannik uummammioqarlutik sulinertik ingerlattuarpaa.

Sulineq inuunermut tunissutaavoq imminut napatinnermik, inuunerissaarnissamut inuiaqatigiinnullu kivitseqataanermik ilaatigut pilersitsiviusartoq.

Ukiuni kingullerni suliffissaaleqinerup nunatsinni appariartornera nuannaarutissaagaluartoq suli suliffissaaleqisorpassuaqartoq, pingaartumillu inuusuttorpasuit suliffissaaleqisutut nalunaarsorneqarsimasut isiginngitsuusaagassaangilaq siunissarlu eqqarsaatigalugu iliuuseqapallanngikkutta ernumanarluni. Ernumanissamummi pissutissaqarpugut, kisitsisimmi allaat ilaatigut ilisimatusarnikkut paasineqartut takutimmassuk inuusuttorpasuaqartoq suliffissaaleqisutut allattorsimaffinnut ilaangikkaluarlutik sulinatik ilinniagaqaratilluunniit inuuneqartunik.

Inuiaqatigiittut unammilligassarput annertoq ataatsimoorluta iliuuseqarfigisariaqarparput ajornanngippat sukkanerpaaq atorlugu. Inuusuttummi ilinniagaqarnermikkut sulinermikkulluunniit nunatsinni kivitseqataasinnaasut piffissami pilersuisussat pilersorneqartussaniit ikinneruleralluttuinnarfissaanni tamaasa pisariaqartippagut.

Siunnersuuteqartoq Nivi Olsen isumaqatigaarput Majoriamut aningaasalersuinitta nalilersornissaanik qaqitaqarmat. Aningaasarpasuummi suut tamaasa katikkaanni 100 mio. kronerinit ikinnerunngitsut Majoriamut atorneqartartut anguniakkamut siunnerfigineqartumut ilumut kinguneqarluartumik atorneqartarnersut nalilersussallugu inissaminiimmat.

Tunngaviatigut inuusuttut Majoriaq aqqutigalugu meeqqat atuarfianni angoreersimasassaasunik ilinniartarnerat pisariaqartussaannikkaluarpoq, meeqqammi atuarfianni ilikkarneqartussat ilikkareerreqarsimallutik inuusuttut ilinniarnissamut appakaassinnaanissaat siullertut anguniagassaammat.

Pisariaqartitsineq qiviarlugu ingasappallaarsorineqarsinnaagaluartoq oqaatigissavarput Majoriamut aningaasaliivallaartartugut aningaasaliissutimmi meeqqat atuarfiannut atoraanni isumatusaannerussagaluarpat. Ilisimasammi naqissuserluakkamik takutippaat siusissukkut ilinniartitaanermi iliuuseqarutta ajornanngippallu meeqqat atuarfianni atuartut mikineraniit annertusisamik pisariaqartitaannik iliuuseqarfigutsigit angusassaq pitsaanerpaaq tassaniittoq.

Unammilligassagulli ullumikkutut itsillugit Majoriap pisariaqartinneqarnera piuvoq taamaattuaannartussaananeranni eqqarsalissanngitsugut Inuit Ataqtigiit isumaqarput. Iliuuseqarniarta, qamiteriniaraluarnertut taaneqarsinnaasumik aaqqiissutissat piunaarlugit aqqitassagut siusissukkut iliuuseqarfigisarnissaat suli sakkortusisaanerumik anguniarniartigu. Taamak alloriassagutta ullumikkorniit pitsaanerujussuarmik suliassaqarfiit akimorlugit sulisariaqarpugut. Ajornaqaaq Naalakkersuisoqarfiit akornanni ataqtigiissagassaagaluanik ataqtigiissaarisanninneq immaqa ilaatigut 'uangaana taanna akisussaaffiga illit susassarinnigilamik' eqqarsarnermit tunngavilik unittariaqalerpoq. Pitsaanerumik ataqtigiinnerusumillu sulisinnaavugut tamanna uummammioralugu suliniarta.

Nunatsinni suliffissaaleqisuuneq sulileqqinnissamut ilinnialernissamulluunniit aqqutissiuussiffiusunngortinniartigu. Nukiimmi tamaasa pisariaqartippagut aqqutissiuunniartigit.

Taamak oqaaseqarluta siunnersuut ilalerlugu Inuussutissarsiornermut Aatsitassanullu Ataatsimiitsitaliamut innersuupparput. Tassanilu Naalakkersuisut allannguutissatut siunnersuusiat soqutiginarloq sammisap sukumiisumik suliarinerani ilanngullugu sammineqassasoq innersuullutigu.